



Compostela, Nadal de 2012. Dende hai algúns anos, ADEGA desenvolve nestas datas campañas relacionadas co Nadal:

“Neste Nadal... os meus

**agasallos sen pilas”
das raíñas magas”**

, “Carta

ou ”

[Por un Nadal máis ecolóxico](#)

” foron algunhas das iniciativas que invitaban a reflexionar sobre a importancia da **contención do consumo**

nestas datas. Animamos á cidadanía neste 2012 a afrontar as festas e o vindeiro ano con espírito ecoloxista. Malia á crise, as previsións de consumo nestas datas non son moi diferentes ás de outros anos, mais o realmente certo é que

o ecosistema Terra si está en crise

dende hai tempo. Non podemos sacrificar o ambiente en prol dun progreso consumista e espoliador. Outra maneira de vivir é precisa se queremos conservar a riqueza común que é a diversidade natural.

A celebración do solsticio de inverno ou da festa relixiosa converteuse para a maioría nunha [festa do consumismo](#)

. Na sociedade actual somos representados como cidadáns consumistas, que en decembro exaltamos esta faceta de xeito que este podería ser tamén o ”

[mes do orgullo consumista](#)

”. No entanto, cada vez somos máis os que nos opoñemos a esta esquizofrenia das compras superfluas.

Probablemente, a crise económica contribúa a reducir o impacto, pero o ambiente leva décadas clamando por unha redución no ritmo de consumo de recursos naturais. Constátase un gasto de enerxía superior ao necesario, unha produción de residuos esaxerada, o aumento do uso do transporte privado, o incremento de emisións de efecto invernadoiro e da contaminación en xeral. Son estes os síntomas dunha sociedade en perigo.

Eis algúns **consellos** para que o noso comportamento nestas festas non contribúa a deteriorar o noso patrimonio natural.

- Na nosa mesa **mellor produtos locais e de tempada**, sen esaxerar en cantidade para non ter que tirar despois a comida. Evita aqueles alimentos que percorreron moitos quilómetros até o noso prato procedentes de monocultivos en zonas taladas de bosque tropical, como son as ananás, ou ben de ecosistemas fráxiles, como o caso da cría de lagostinos nos manglesais ou capturados con pesca de arrastre. Innova este ano e muda de menú, compra produtos ecolóxicos, de pesca artesanal e de comercio xusto.

- **Consume produtos galegos** e etiquetados en galego. O consumo de alimentos, artesanía, etc. feitos en Galiza, por pequenas empresas, e de xeito artesán, contribúe a reducir emisións e inviste nos teus veciños e veciñas máis próximos.

- **Non espolies o monte**, evita arrincar seres vivos para os adornos naturais. Especies como o acivro ou a xilbardeira (*ruscus*) foron comunmente arrincados para este fin. Mellor que eles fiquen no medio natural e nós lle botemos imaxinación á hora de engalanar a casa por exemplo con materiais reciclados.

- De agasallar **mascotas** (**mellor en adopción** procedentes dun refuxio de animais) ou plantas, ten en conta que a persoa á que vai destinada será a responsábel de coidala axeitadamente todo o ano. Poderá?... Con todo, procura evitar agasallos de animais ou plantas exóticas porque poden provir de ecosistemas en perigo. Ademais, a súa liberación fortuíta ou ben intencionada no noso ambiente pode causar graves danos á biodiversidade autóctona.

- Se precisas mercar ou agasallar cousas de países lonxanos lémbrete das entidades galegas que desenvolven iniciativas de **comercio xusto**. Agasalla compromiso co patrimonio natural e cultural de Galiza e contribúe a manter viva unha loita de máis de 36 anos.

- Finalmente, unha boa idea para agasallar nestas festas sempre é [facerte/lle socio/a de ADEGA](#).

E lembra, **consume sen consumirte**. Bo nadal.

Para máis información:

Ramsés Pérez Coordinador de Programas de Educación Ambiental de ADEGA Teléfono:
616 238 050

ramses@adega.gal

Marie Lacassagne

Vogal de Consumo de ADEGA

Teléfono: 675 155 749